

PRIMA SESSIONE URDINARIA DI U 2021
1ER SESSION ORDINAIRE DE 2021
25 È 26 FERRAGHJU
25 ET 26 FEVRIER

2021/O1/014

**REPONSE DE MONSIEUR SAVERIU LUCCIANI
A LA QUESTION DEPOSEE PAR MONSIEUR PASQUALE CARLOTTI
AU NOM DU GROUPE « PARTITU DI A NAZIONE CORSA »**

OBJET : Capes di lingua corsa è novu CPER.

A riforma di u CAPES, o piuttosto di i CAPES di lingua, mudifichighja a so forma, ma di più chè cusì, u so sensu prufundu. È dunque, l'averete capita, quella di u CAPES di corsu.

Cum'è tante volte, cum'è per a riforma di u liceu è di u basciagliè, u Statu nè chjama neppuru dumanda l'avisu di l'Università è di u Cunsigliu Esecutivu.

Ne prufittu per salutà e reazione diverse, quelle di l'associ, sindacati è sopr'à tuttu di l'Università cun quale simu in cuntattu permanente da u principiu.

Un passu in daretu per ricordà à i più giovani sta storia di u CAPES ; eramu in tempu di lotta di liberazione nazionale, cù u ben' di Sindicatu Corsu di l'insignamentu. Fin' di l'87, in vigilia di reelezione di u presidente Mitterand, aviamu dumandatu un CAPES. Mi ricordu d'un scontru cù Jospin, in l'auturnu di l'88, tandu ministru di l'Educazione, è di a creazione annunziata davant'à st'assemblea. Ma mi ricordu di l'annullazione di stu CAPES bivalente, in lu 90, è di a negoziazione per ottene perfine stu CAPES, per a sessione di u 91 – 30 anni fà. Ci eramu o Pasquà, ci eramu.

Simu di pettu à un antru rinculu per u spaziu di u corsu, è, anch'eiu, ùn vogliu entre quì in i particolari, belli specificati in a stampa è in a lettera mandata cù a mo cullega Josepha à u ministru Blanquer.

Li ricordemu quantunque « en francais dans le texte » chì a Cullettività hà dipoi a lege di u 2002 a cumpetenza d'elaborazione di a pulitica d'insignamentu di a lingua corsa è ch'ellu ci vole à cunsultalla quand'ellu si tratta d'una riforma qualunque in stu duminu.

Cusì chì l'avemu sullicitatu per un scontru cù u fine più largu di parlà di u rinnovu di u quattu di sviluppu di a lingua in u sistema educativu, à tutti i livelli.

Ma per turnà à risponde à a vostra dumanda, chì dite chì oghje a primura di l'insignamentu di u corsu è u bilinguisimu face l'unanimità in Corsica, s'ella ci pare à noi capita è certa, quallà, fateci casu, l'affari serebbinu sempre in francese.

Cuntinuemu : più in là, ammentate, in listessu filu u neguziatu indiatu trà Esecutivu è Statu nant' à a parte « lingua corsa » di u Cuntrattu di Pianu Statu Regione, u cusì dettu CPER è ci dumandate à chì ne simu inquant' à e discussione nantu à u CAPES è u CPER.

Averemu forse l'occasione, dumane, di turnà à parlanne, ma intantu, per faccila corta sta mane, vi possu dì chì u ministru cunnosce oramai e nostre dumande :

- Per u CAPES, u mantenimentu di a forma è di e prove attuale.
- Dinò una dumanda per mette in via un CAPES bislinguu dettu di e discipline non linguistiche per sviluppa e figliere bislingue di u secundariu.

Accantu, sappiate chì n'avemu prufittatu per dumandà primamente chì u cuefficiente di l'uzzione LVC Lingua regionale à u basigliè sia simile à quellu di l'uzzione Lingue è Culture di l'Antichità, secundaria chì a lingua detta regionale si pudessi piglià, cum'è quelle, da seconda uzzione. L'ispezzione generale ci hà da dà una risposta stu pocu.

Per ciò chì tocca à u CPER, chì serà u primu cocustruitu trà u Statu è u nostru esecutivu, ci seranu ogettivi maiò à accimà, sempre à prò di a generalizzazione di u bislinguisimu è d'un'apertura nant' à u plurilinguisimu.

Dunque un rinforzu di 4 ogettivi maiò :

- Immersione : sustegnu è sviluppu massiciu di e strutture d'accolta sculare è apertura di 3 centri d'immersione supplementarii,
- Un sustegnu rinforzatu per e filiere bislingue è immersive cù un pianu pluriannuale d'ecchippamentu.
- Furmazione più chè mai :
 - o cù a cuntinuazione di u grande pianu di furmazione di u primariu chì piglierà in contu ancu l'immersivu per e scole materne
 - o cù a messa in via d'un grande pianu di furmazione per u secundariu, a creazione d'una squatra pedagogica d'accompagnamentu è a pubblicazione d'una lettera quattru di a rettrice nant' à a lingua corsa à a rientrata,
- Infine, incalchemu in u duminiu di l'Ecchippamentu à prò d'un sviluppu generalizatu di a pruduzione è di a sparghjera di risorse pedagogiche, didattiche è d'arnesi di nurmalizzazione linguistica (CANOPE, Università, tira avant'è tocca)

Eccu. Un CPER cù un bugettu superiore à quill'altru, di circa 20 milioni per cunfirmà l'azione è l'avviu di l'anzianu di 17,4 milioni, cù sta vulintà d'un cappià mai, quella chì v'invita à fanne altr'è tantu, inghjilocu, da fà di u Corsu, a lingua di tutti, propiu una lingua per tutti.